



c. 30





2576  
BVLLE DE  
NOSTRE S. PERE

LE PAPE SIXTE V.

contre Henry de Valois, &  
ses complices,

\*\*\*

PAR LAQUELLE ILS SONT  
declarez excommuniez, si dans dix iours ils ne  
deliurent & mettent hors de prison Messieurs  
l'Illustrissime Cardinal de Bourbon, & le Reue-  
rendissime Archeuesque de Lyon: & par mesme  
moyen sont citez à cōparoïr deuant sa Sainteté,  
pour respondre sur le faict du massacre commis  
en la personne de l'Illustrissime Cardinal de  
Guise, & emprisonnement desdicts Cardinal de  
Bourbon & Archeuesque de Lyon.



M. D. LXXXIX.

X

Case

F

39

.326

1589ca

THE NEWBERRY  
LIBRARY





# BVLLE DE NOSTRE

SAINCT PERE LE PAPE

*Sixte V. contre Henry de Valois &  
ses complices, &c.*

\*\*\*



**S**IXTE Euesque seruiteur  
des seruiteurs de Dieu, pour  
la memoire du temps adue-  
nir. La prouidence de Dieu,  
la hauteur de laquelle ne  
peut estre sondee ny mesu-  
ree, gouuernant par vn clein d'œil les choses  
terrestres & celestes, a commis à Sainct Pier-  
re Prince des Apostres, & à ses successeurs les  
Euesques & Papes de Rome, les clefs du  
Royaume des cieux, & toute la puissance  
qu'il a donné à ses Apostres tresabondam-  
ment, & pareillement a edifié son Eglise sur  
la fermeté & solidité de sa foy, par ses pa-  
rolles tres-veritables: *Je te dis que tu es Pier-  
re, & sur ceste Pierre j'edifieray mon Eglise,*

& iamais les portes d'enfer ne pourront pre-  
 ualoir contre icelle : & , ie te donneray les  
 clefs du Royaume des cieux , & , tout ce que  
 tu lieras sur la terre , fera lié aussi és cieux , &  
 tout ce que tu deslieras sur la terre , sera deslié  
 és cieux. D'où vient que nous qui sommes,  
 bien que fort inegaux en merites & graces,  
 par la disposition de la clemence diuine ap-  
 pillez à la chaire tressaincte dudit saint  
 Pierre , & assis au throne de iustice , & selon  
 la voix du Prophete Hieremie: Voicy ie t'ay  
 mis sur les gens & Royaumes , à fin que tu  
 arraches & destruisés , & iettes çà & là , &  
 mettes en piéces, edifies & plantes, ayant sur  
 tous les Roys & Princes de la terre vniuer-  
 selle , & sur tous les peuples, gens, & nations  
 souueraine puissance, qui nous a esté donnee,  
 non par l'institution des hommes : mais de  
 Dieu, deuons imiter le mesme Seigneur, qui  
 estant bening & misericordieux , modere la  
 vengeance preparee à celuy qui le preuiet,  
 & ne chastie de peine rigoureuse ceux qu'il  
 voit estre impenitens , que premier il ne les  
 ait menacez : mais enuers ceux qui pechent  
 continuellement , & perseuerent en leurs pe-  
 chez , quand la grauité de leurs forfaits sur-  
 passe les bornes de misericorde , il exerce ses  
 armes



armes celestes de iustice , à fin que pour le moins craignans la peine, ils retournent à penitence. Semblablement aussi pource que sommes commis de Dieu au gouuernement de l'Eglise vniuerselle, nous sommes cōtraints de pourueoir salutairement à ce que par les embusches de l'ennemy du genre humain, le salut de ceux qui sont sous nostre charge ne tombe en ruine , ou soit amené en danger. Mais les pecheurs par nostre paternelle admonition & reprehension , ou soyent corrigez de leurs fautes, & retournent à penitence, ou bien si le zele de charité ne peut rien profiter en leur endroit , par les remedes des exhortations & admonitions : & s'ils se montrent incorrigibles en fin par la pointe du glaïue spirituel , lequel nous lançons , non pas pour la ruine , mais pour le salut , ils soyent retranchez & separez comme membres pourris du corps de l'Eglise sain & entier, lequel nous deuons garder net de toute tache. Certainement comme és mois passez par vn commun bruit & rapport de plusieurs , nous eussions ouy dire souuent , non sans grande perturbation d'esprit & horreur : & depuis nous ayons esté aduertis par les lettres de nostre fils bien-aimé Iean François Prestre Car-

dinal du tiltre des Saincts Nereus & Achilleus, surnommé Morosin, Legat collateral de Nous & du siege Apostolique en France, ce qui est aussi notoire à vn chacun, qu'Henry Roy de Frâce auroit faict prendre Louys de bonne memoire Prestre Cardinal de Guise, Archeuesque ou perpetuel administrateur de l'Eglise Metropolitaine de Reims, & Legat né en France de Nous & du siege Apostolique, & iceluy faict mettre en prison, & le lendemain veille de la Natiuité de nostre Seigneur Iesus Christ l'auroit fait massacrer, outre ce qu'il auroit semblablement fait prendre nostre fils bien-aymé Charles Prestre Cardinal de l'Eglise Romaine du titre de Sainct Chrisogone, dict de Bourbon, Legat collateral de Nous & du siege Apostolique en la cité d'Auignon, & Comté de Venisse, & nostre venerable frere Pierre Archeuesque de Lyon, par lesquels Cardinaux ledict Henry nous prioit initamment en mesme temps que nous fissiōs ledict Archeuesque de Lyon Cardinal de la sainte Eglise Romaine: Et que encor il les auroit faict mettre en prison, & commandé qu'ils fussent gardez en icelle, comme de faict ils sont pour le present prisonniers, detenus, & gardez. Ayant pour ce faict

faißt avec tous les coupables , complices, fauteurs , defenseurs , & recelleurs , & ceux qui luy en ont baillé le conseil , secours , & aide, & qui luy ont presté la main, garde, & ministère , encouru excommunication , & autres sentences & censures Ecclesiastiques, & peines qui sont portees par les sacrez Canons & ordonnances, tant generales que particulieres, des saincts Conciles generaux, des Papes de Rome noz predecesseurs , & aussi contenues & publiees en nos lettres qu'on a accoustumé lire le Ieudy saint. Nous qui auons de tout temps embrassé lediçt Roy, & iceluy aymé d'une charité paternelle , & amour aduantageux par dessus les autres, n'auons peu n'estre touchez d'une tresgrande douleur & fascherie , pour l'enormité de ses delicts & sacrileges , comme par cy deuant nous l'auons dit , & nous en sommes pleins avec dueil en nostre secret consistoire, deuant noz venerables freres les Cardinaux de l'Eglise Romaine. Et pendant que nous attendions que lediçt Henry Roy , se repentant du faißt , & recognoissant sa faute , reuinist à soy , deliurant & donnant liberté ausdiçts Cardinal de Bourbon, & Archeuefque de Lyon , & demandant humblement  
l'abso



l'absolutiō des choses susdictes, comme nous auons souuentefois fait entendre à son Ambassadeur ordinaire estant au pres de nous, Iean de Viuonne Marquis de Pisani, & à son extraordinaire Ambassadeur Hierosime Gondy, & depuis encor à nostre venerable frere Claude Euesque du Mans, par luy specialement enuoyé vers nous pour cest effect, & l'en aurions exhorté grandement. Iceluy Henry Roy, non pas comme un vray penitent, & recognoissant à bon escient son péché, & le confessant avec l'humilité de cœur qu'il deuoit come les Roys & Princes Chrestiens, se repentans ont fait iusques icy, ne s'est iamais soucié de nous demander ladicte absolution, ains n'embrassant nos conseils salutaires & paternels, auroit differé iusques à huy de relascher & mettre en liberté lesdicts Cardinal de Bourbon & Archeuesque de Lyon. Nous donques combien que nous peussions au parauant proceder à la declaration des peines encourues par ledict Henry Roy, neantmoins par nostre pitié paternelle & singuliere enuers luy, & pour la dignité de l'honneur Royal, le traitant doucement, auons attendu qu'il vint à se repentir plus qu'il n'estoit raisonnable, veu que le cinquiesme

quierme mois se passe, ne pouuons ny deuons  
 differer d'auantage d'apporter à ces maux les  
 remedes Canoniques & conuenables pour le  
 salut & conseruation de l'ame dudict Henry  
 Roy, qui nous est plus chere, & dont nous  
 faisons plus d'estat, que de toutes choses de  
 ce monde. Mais comme pour le deuoir de  
 nostre charge pastorale, nous soyons tenus  
 d'auoir esgard, & pourueoir à l'asseurance de  
 tous les fideles Chrestiens, & principalement  
 des Cardinaux de la saincte Eglise Romaine,  
 & Prelats Ecclesiastiques, à fin qu'avec  
 vn si grand scandale du Royaume de France,  
 & de toute la Chrestienté, & danger de  
 nostre dignité, & du sainct siege Apostolique,  
 lesdicts Cardinal de Bourbon & Archeuesque  
 de Lyon ne soyent plus longuement  
 detenus en prison, & nous contrainsts  
 de rendre compte au rigoureux iugement de  
 Dieu, d'auoir negligé ce soing, & l'admini-  
 stration de nostre charge & office, & ayant  
 pris sur ce le conseil & aduis, apres longue &  
 meure deliberation, de noz venerables freres  
 les Cardinaux de la saincte Eglise Romaine,  
 NOVS EXHORTONS LE  
 DICT HENRY ROY de tout  
 nostre cœur, par les entrailles de misericorde



de , & le sang de Iesus Christ nostre Dieu & Seigneur , espandu pour racheter le genre humain , & l'admonnestons & requerons de l'auctorité Apostolique , par la teneur de ces presentes, vne, deux, & trois fois, & en vertu de la sainte obeyssance luy mandōs & commandons qu'il ait à eslargir lesdicts Cardinal de Bourbon & Archeuesque de Lyon , soit qu'ils soyent detenus sous la garde de quelques soldats , ou autrement en quelque façon que ce soit, & qu'il les laisse aller, par luy ou par autre ou autres, dās le terme de dix iours suyuant immédiatement la publication des presentes , qui doit estre faicte selon la maniere & forme qui sera dicte cy apres. Et cessant toute demeure , defence , excuse , ou pretexte , qu'il ait à les deliurer, & mettre en plaine & entiere liberté , comme ils estoient au parauant , avec toute assurance & seure conduicte , & depart reallement & de faict, & soit tenu de les rendre & remettre , & de faict les deliure , & delaisse librement , & les rende & remette en leur ancienne & plaine liberté, avec toute assurance, seure conduicte, & depart , ou bien qu'il face & commande qu'ils soyent eslargis, deliurez, rendus, & remis, comme dict a esté. Et pareillement nous face

face apparoir, & rende certains par ses lettres  
 signees de sa propre main, & scelees de son  
 seau, ou bien par instrument public & au-  
 thentique, qu'il sera tenu enuoyer à nous, &  
 au siege Apostolique dans trente iours apres  
 ledict eslargissement, qui se doit faire dans  
 dix iours, comme il a eslargi, & deliuré les-  
 dicts Cardinal de Bourbon & Archeuesque  
 de Lyon, & iceux remis en leur ancienne &  
 plaine liberté, avec toute asseurance, & seure  
 conduicte & depart. Que si ledict Henry  
 Roy n'obeyt à noz exhortations, admoni-  
 tions, requestes, & commandemens, & ne  
 deliure dans les dix iours susdicts, les mesmes  
 Cardinal de Bourbon & Archeuesque de  
 Lyon, & ne les rend & remet en leur ancien-  
 ne & plaine liberté, avec toute asseurance,  
 seure conduicte, & departement, ou ne faiet  
 qu'ils soyent relaschez, deliurez, rendus, &  
 remis, comme dit a esté, & ne nous faiet  
 apparoir & rend certains dans trente iours,  
 comme dessus a esté dict, de leur eslargisse-  
 ment, deliurance, restitutiō & r'enuoy susdict.  
 DE LA PART DV DIEV  
 TOVT PVISSANT, & de l'au-  
 thorité de ses bien-heureux Apostres Sainct  
 Pierre & Sainct Paul, & de la nostre des

maintenant, comme pour lors. Nous disons,  
 prononçons, & declarons que ledict Henry  
 Roy, & tous ceux quiconques soyent, qui en  
 ceste noire violence, & mainmise, capture,  
 emprisonnement, detention, massacre sus-  
 dits, ont esté coupables, complices, & fau-  
 teurs, & qui l'ont assisté de conseil, aide, se-  
 cours, & luy ont presté la main, garde, & mi-  
 nistere en iceux, de quelque condition, estat,  
 grade, ordre, & dignité qu'ils soyent, tant Ec-  
 clesiastiques, comme seculiers, sont tombez,  
 & ont encouru damnablement la sentence  
 de la grande excommunication, & le lien  
 d'anatheme, & les autres censures Ecclesiasti-  
 ques portees & publiees par les sacrez Ca-  
 nons susdits, & constitutions generales &  
 particulieres, & es lettres qu'on a accoustu-  
 mé de lire de benidy saint. Denonçons aussi  
 publiquement & ouvertement à tous Chre-  
 tiens que ledict Henry, & les susdits, sont  
 excommuniez & separez de l'unité du corps  
 de Iesus Christ, & que comme tels il les faut  
 fuyr & euer en toutes sortes, & neantmoins  
 de la mesme auctorité Apostolique nous ad-  
 monestons & adiougnons pour la premiere,  
 seconde & troisieme fois ledict Henry Roy,  
 & tous & chascuns les susdits coupables,

com



complices, fauteurs, defenfeurs, & recelleurs, & ceux qui leur ont baillé fupport, confeil, faueur, aide, & qui ont prefté la main, ou garde, ou miniftre es chofes fufdictes, tant en ceſte publique & notoire violence, & main-miſe ſur leſdicts Louys Cardinal de Guiſe, & Charles Cardinal de Bourbon, & Pierre Archetrefque de Lyon, & leur capture & detention, qu'au maſſacre dudit Loys Cardinal, & aux autres crimes & excez ſur ce commis, qui ont eſté plus amplement deduits, ou le pourront eſtre à l'aduenir, à ce que ledict Roy par luy, ou par autres ſien Procureur, ou autres ſiens Procureurs, legitime, ou legitimes, inſtruit, ou inſtruits, de ſuffizant mandement pour ceſt effect, & les autres par eux meſmes en perſonne, ſoient tenus de comparoir deuant nous dans le terme de ſoixante iours, à compter du iour de l'execution, & publication des preſentes: deſquels ſoixante iours nous leur en baillons, & aſſignons les vingt premiers, pour la premiere monition canonique, autres vingt pour la ſeconde, & les vingt reſtans pour la troiſieſme, & pour le dernier & peremptoire delay, pour dire, propoſer, & alleguer pour quoy ils ne doiuent eſtre declarez, & denon-

cez auoir encorus, & estre tombez, voire aux  
 autres sentences, & peines spirituelles, &  
 temporelles contenues, & infligees par les  
 sacrez canons & constitutions, pour auoir vsé  
 de ces violances, & mainmises susdits, & a-  
 uoir pris, tué, & detenu les personnes desdicts  
 Cardinaux, & Archeuesque respectiuelement,  
 & pourquoy aussi les subiets, & vassaux du-  
 dict Henry Roy & autres susdits ne doiuent  
 pas estre absous, ou bien declarez auoir ia  
 esté absous pour cela, du serment de fidelité,  
 duquel ils sont obligez à luy, ou à eux,  
 ou autrement pour s'excuser, & defendre le-  
 gitimement, sur ce que dessus. Autrement  
 au cas que ledict Henry Roy, ou son Pro-  
 cureur, ou Procureurs legitimes, ou les coul-  
 pables, complices, fauteurs, & autres sus-  
 dicts qui pourront estre nommez si bon  
 semble en l'exécution des presentes, ne com-  
 parant en personne, ou bien en comparant  
 n'apportent rien qui les puisse legitimement  
 excuser, ou defendre. Nous sans vser d'autre  
 monition, ou citation precedente ( si ce n'est  
 d'auenture par l'office de l'audience des con-  
 tradiètes, s'il nous semble bon ) declaron  
 qu'on procedera par voyé de iustice, à tous  
 & chacuns les actes qui sont necessaires, &  
 conue



conuenables aux choses susdictes, en quelque façon que ce soit, mesme iusques à la declaration, & denonciation, que les sentences, & peines qui sont contenues, & infligees par lesdicts sacrez Canons & constitutions, ont esté encourues, & aussi iusques à la declaration d'absolution, ou à l'absolution mesmes du serment de fidelité, duquel les subiects, & vassaux sont obligez tant aud. et Henry Roy, qu'autres susdicts, en quelque façon que ce soit, comme il sera de droit, & l'ordre de raison le voudra. Au surplus ny ledict Henry Roy, ny autre des susdicts ne pourront estre absous voire au iugement de conscience, de ceste grande excommunication, & lien d'anatheme, & autres censures presentes par aucun Prestre seculier, ou regulier, de quelque ordre que ce soit, ny par aucun Prelat, de quelque dignité, ou auctorité qu'il puisse estre, sinon par nous, ou le Pape qui sera en ce temps, si ce n'est en l'article de la mort, & encor lors en baillant caution de demeurer aux commandemens de l'Eglise, & de satisfaire, ny mesme sous pretexte de quelques facultez & Indultes que ce soyent, ny au tēps du Iubilé de planiere indulgence, ou de la croisade sainte, ou par quelques confession-

naux

naux accordez , & renouuellez à quelques personnes Ecclesiastiques quelles qu'elles soyent , seculiers & de quelque ordre de mandians,ou reguliers, & commandeurs de quelque milice qu'ils soyent, voire aux Euesques, ou ayans plus grande dignité , & aux ordres des religieux,& à leurs monasteres,conuents, & maisons,Chapitres, Colleges,Confrairies, Congregations , Hospitaux , & autres lieux pitoyables , & quelque concession ou confirmation qui en ait esté faite à gens laics, voire audict Henry Roy , & peut estre aussi aux autres Roys de France & autres personnes susdicts, par nous ou ce saint siege , & par les decrets de quelque Concile que ce soit,par parolle,lettres,ou escripture quelconque , en general , & en particulier : combien que en iceux soient compris expressement les cas qui sont és lettres qu'on a de coustume de lire le leudy saint , sinon que on face expresse , & speciale mention de noz presentes lettres , & non par la clause , les teneurs desquelles ou autres quelconques clauses generales , ayans mesme signification. Nonobstant tous priuileges , Indulgence , & lettres apostoliques quelconques , generales, ou speciales baillées audict Henry Roy, ou à  
ses

ses predecesseurs ou aux autres susnommez,  
ou à aucun d'eux, ou à quelques autres de  
quelque ordre, estat, condition, dignité, ou  
preeminance qu'ils soient, voire combien  
qu'ils fussent esleuez à la dignité Pontifica-  
le, Royale, ou à quelque autre Ecclesiasti-  
que, ou mondaine, ou leurs Royaumes,  
Prouinces, citez, & lieux, pour quelque cause  
que ce soit, par maniere de constitution per-  
petuelle, contract, ou remuneration, ou en  
quelque autre forme & teneur, & avec quel-  
ques clauses que ce soit, voire derogatoire  
aux derogatoires, encor que lesdicts priuile-  
ges ayent esté souuentefois approuuez, & re-  
nouuellez, & iacoit qu'ils contiennent, qu'ils  
ne puissent estre excommuniez, anathema-  
tizez, ou interdictz par lettres apostoliques,  
ne faisant plaine & expresse mention, & de  
mot à mot de cest indult, ou priuilege & de  
leurs ordres, lieux, noms propres, surnoms, &  
dignité. Nonobstant aussi toutes coustumes  
& autres obseruances quelconques escriptes  
ou non escriptes, par lesquelles ils se pour-  
roient aider, ou defendre de n'estre liés, ny en-  
coursus és senētes, & censures cōtenues en ces  
presentes lettres. A tous lesquels priuileges, &  
toutes choses contraires nous derogons spe-



ciallement & expressement à l'effect des présentes seulement, aussi bien que si les teneurs d'iceux estoit icy inferez de mot à mot, sans rien omettre, & afin que ces presentes lettres puissent plus facilement paruenir, & paruiennent à la connoissance dudit Henry Roy, & autres susnommez, ausquels en ces temps turbulents l'accez n'est pas libre ny seur, pour les admonester en personne & les adiourner, comme il nous est notoire. Nous declaronz aussi par la teneur de ces presentes & commandons que ces lettres soient leuës, & publiees en la maniere accoustumee tant en nostre ville principale de Rome, en la grande Eglise du Prince des Apostres, & deuant le portal de la Chancellerie Apostolique, ou en la place du Champ de fleur, par quelque vn de noz courriers, qu'aussi au Royaume de France és portes, & entrees de deux, ou trois des six Eglises Cathedrales qui en suivent. C'est assauoir, de Poitiers, d'Orleans, de Chartres, de Meaux, d'Agen & du Mans, & soient là attachees & laissees par quelque espace de temps, & estant ostees, soit laissee copie d'icelles, aussi attachee ausdicts lieux. Ordonnons que la publication desdictes lettres estant ainsi faicte puisse si bien

bien contraindre & obliger à y obeir, tant  
 ledict Henry Roy, comme aussi tous les au-  
 tres coulpables, és choses susdictes, compli-  
 ces, fauteurs, defenſeurs, recelleurs, & ceux qui  
 luy ont donné conseil, ſupport, & aide, &  
 luy ont preſté la main, garde, & miniſtere,  
 deſquels nous auons ia parlé, & vn chacun  
 d'iceux, en particulier, comme ſi ces lettres  
 icy auoient eſté leues, intimes & ſignifiees  
 à eux, ou à chacun d'eux en perſonne, n'e-  
 ſtant vrayſemblable qu'ils puiſſent ignorer  
 en aucune façon, les choses qui auront eſté  
 faiſtes ſi ouuertement & publiquement. Mais  
 pour autant qu'il ſeroit bien difficile, que ces  
 preſentes lettres fuſſent portees en chaſque  
 lieu, & place où il les faudroit porter, nous  
 voulons qu'on adiouſte la meſme foy à leur  
 copie, voire imprimee, eſtant ſignée de la  
 main de quelque Notaire public, & ſcellee  
 du ſeau de quelque perſonne conſtituee en  
 dignité Eccleſiaſtique, en tous lieux, & en-  
 droits, en iugement, & dehors iceluy, que l'on  
 adiouſteroit à l'original, ſ'il eſtoit exhibé, &  
 monſtré. Qu'il ne ſoit donc loyſible à per-  
 ſonne du monde de violer ou rompre ceste  
 page de noſtre exhortation, monition, re-  
 quiſition, mandement, & commandement,



prononciation, prefixion, declaration, denon-  
tiation, citation, assignation, decret, de-  
rogation & volonté, & que nul soit si hardy  
& temeraire d'y contreuenir. Que si quel-  
qu'un prend ceste hardiesse d'y attenter, qu'il  
sçache qu'il encourira l'indignation de Dieu  
tout puissant, & de ses bien heureux Apo-  
stres saint Pierre, & saint Paul. Donné à  
Rome au palais de saint Pierre en l'an de  
l'Incarnation de nostre Seigneur 1589. le cin-  
quiesme iour de May, & de nostre siege l'an  
cinquiesme.

M. VESTRIVS BARBIANVS.

A. DE ALEXIIS.

Le lieu du plomb pendant †.

Enregistree chez Marcel le Secretaire.

